

李文忠公奏稿

李文忠公奏稿

卷之二十一目錄

存營練軍無可添派摺

同治十二年正月二十日

張家口糧臺請仍撥部餉片

同治十二年正月二十日

赴津籌辦換約並查橋道摺

同治十二年二月初一日

滹沱河修復隄壩片

同治十二年二月初一日

派員襄辦換約片

同治十二年二月十七日

吳煦請建祠摺

同治十二年二月十七日

請復永定河工需原額摺

同治十二年三月二十五日

津郡建曾國藩專祠摺

同治十二年三月二十五日

江蘇勸辦津賑請獎摺

同治十二年三月二十五日

張家口糧臺請撥部餉摺

同治十二年四月初三日

日本換約舉事摺

同治十二年四月初七日
附鈔單二件

倭使往還禮物片

同治十二年四月初七日

蘆課奏銷緩期摺

同治十二年四月十一日

潘鼎新入都片

同治十二年四月十一日

福濟捐賑片

同治十二年四月十一日

淮軍西征報銷摺

同治十二年四月十一日
附清單

外洋軍火教練用款片

同治十二年四月十一日
附清單

軍需用款增減例案片

同治十二年四月十一日

津郡改照練軍營制摺

同治十二年四月二十三日

海防支應局報銷摺

同治十二年四月二十三日

奏留李興銳摺

同治十二年四月二十三日

橋道經費請發十成摺

同治十二年五月十一日

修築滋河豬龍河隄捐

同治十二年五月十一日

永定河工請照額撥款捐

同治十二年五月二十八日

部硝請變通捐

同治十二年五月二十八日

挑濬中亭河捐

同治十二年五月二十八日

李文忠公奏稿卷二十一

全集一之二十一

桐城吳汝綸編錄

存營練軍無可添派摺

同治十二年正月二十日

奏爲遵

旨查明宣化古北口練軍無多未便續行調派情形恭摺覆陳仰

祈

聖鑒事竊臣欽奉同治十一年十二月十九日

上諭前因烏里雅蘇城防緊要經奎昌等奏請於庫倫練軍內
抽調古北口宣化兵共五百名以資防禦當諭令張廷岳等照數
派撥茲據張廷岳等奏稱此項練軍現在分紮庫倫迤西一帶扼
要巡防未便遽行掣動若徑由宣化古北口調撥前往與察哈爾
馬隊分起直達烏城較爲妥速等語所陳自是實在情形烏庫兩

城防守同關緊要著李鴻章卽於宣化古北口練軍內迅速挑選
五百名裹帶行糧分起速赴烏城交奎昌等調遣等因欽此遵查
宣化練軍本僅三營業於十年正月內挑派馬隊練兵二百名步
隊練兵八百名奏派游擊徐平川帶赴庫倫協防此外存營練軍
只二百餘名經臣於上年十一月奏明添練馬隊一營現在尙未
成軍無從抽調當經恭錄咨商直隸提臣傅振邦在於古北口練
軍內酌量調撥茲准該提督函稱古北口爲京城後路近年奉天
馬賊竄擾無常熱河毗連草地時有匪蹤出沒聲經熱河都統庫
克吉泰咨撥古北口馬步隊就近協助防剿該口原練添練步隊
四營馬隊一營已於十年五月間遵
旨調派步隊兩營練兵一千名協防庫倫現僅有步隊兩營馬隊
四哨官兵共一千二百名分守關隘兼爲熱河草地一帶聲援力

量殊形單薄若再撥練軍五百名遠赴烏城誠恐近畿邊防太空
僅口外賊匪乘間竊發關係非輕請仍

奏由庫倫留防之古北口練軍內抽撥赴烏移緩就急庶內外防
務不至偏廢等情函請核辦前來臣查直隸添設練軍原爲拱衛
京師以備緩急之用宣化古北均爲北邊緊要門戶近來口外多
事尤應酌留重兵稍壯聲勢上年兩次調派馬步練兵二千名赴
庫協防山直自備糧餉已屬不遺餘力日下宣化練軍僅存二百
餘名古北口亦僅存練兵千餘名捍衛

畿輔彈壓地方必不可少該提臣所稱未便再議抽調云係實在
情形查烏城原有杜嘎爾等所部各營其續撥察哈爾馬隊二百
五十名亦將到防計已足資分布無須添調客軍儼必需步隊協
防庫倫現尙靜謐距賊較遠應請仍遵前

旨於庫防宣古兩軍二千人內抽撥五百人就近赴烏尙不難於
兼顧合無仰懇

天恩敕下烏里雅蘇臺將軍庫倫辦事大臣會商酌辦勿存推諉
致誤事機所有宣化古北口存營練軍僅資分守無可添調緣由
理合恭摺由驛覆陳伏乞

皇太后

皇上聖鑒訓示謹

奏

張家口糧臺請仍撥部餉片

同治十二年正月二十日

再臣前准戶部咨稱部庫異常支絀此次撥給張家口糧臺察哈爾都統衙門銀兩係不得已先其所急若再陸續請撥萬難爲繼該處每年須用實銀若干應令預先奏明由部指撥外省款項協濟等因具奏奉

旨依議欽此當經轉飭口北道奎斌妥籌詳覆茲據該道稟稱該臺辦運口外各路征兵口糧已於上年秋杪冬初運至本年閏六月爲止曾經察哈爾都統奏明每年夏秋二季雇車雇駝專運軍糧四月初開牛車開行應運本年秋冬二季之糧秋開駝駝壯又須辦運次年春夏二季之糧現辦原調吉林黑龍江馬隊二千名察哈爾馬隊一千二百五十名及杜嘎爾隨營官兵應需米價口袋等項上年報銷共用銀四萬九千八百餘兩今烏魯木齊又

調吉林黑龍江馬隊一千名烏里雅蘇臺又調察哈爾馬隊二百五十名均須添運口糧加以烏魯木齊都統行營月糧四百石每年共約需銀六萬餘兩此次領到部餉三萬兩歸還借墊各款餘銀無幾夏間開辦車運又須接濟溯自設立糧臺以來各營糧石預期購運惟恃請領部餉及時解到辦理不致掣肘兵食無虞缺乏今若改由外撥必致停運待銀諸形窒礙懇仍准請撥部餉以濟要需等情前來臣查口外各城遠在數千里及萬里以外原因該處不產米糧須由內地購辦現在各將軍大臣陸續添調多兵添兵卽須添食均奏請由口北糧臺辦運軍中無糧之患甚於無餉餉可緩待而糧須急運稍有遲誤飢潰堪虞直隸本缺額省分連年災歉無可代籌若待外省撥款路遠日長萬難應期而至采辦轉運必致貽誤若餉誤而運停邊外各軍深恐立腳不住統計

該糧臺每年僅用銀六七萬兩於帑項出入甚微於軍情關係極重實非各路請撥巨款可比仰懇

天恩仍准查照歷辦成案由臣隨時酌量情形續請部餉督飭該道籌節動支庶邊荒軍食有資大局藉可措拄所有張家口糧臺用款仍懇

飭撥部餉緣由理合附片具陳伏乞

聖鑒訓示謹

奏

赴津籌辦換約並查橋道捐

同治十二年二月初一日

奏爲遵

旨赴津籌辦日本換約事宜並派員查勘橋道恭摺具陳仰祈

聖鑒事竊臣欽奉正月十八日

諭旨日本使臣來津換約舊派李鴻章將上年所立條約妥爲互換等因欽此遵查日本使臣副島種臣去冬照會有來月下旬啟行之說現雖未據上海關道稟報到滬而北河業已開凍竊計日本距中國最近輪船迅速數日可到臣既奉

旨派辦換約應照向章於開河時赴津料理一切該使臣早晚至津便與會議酌辦庶易就緒臣連日督同司道將春融應辦地方河道各工程以工代賑分別籌款派員妥速興辦並應辦要政逐一清理擬於二月初六日由省啟程馳赴天津俟日本使臣抵境

及辦理情形隨時

奏報至本年三月初五日

皇上恭奉

兩宮

皇太后祇謁

東陵所有

蹕路經由道段橋梁並

行宮地盤應辦事宜

臣於奉准部咨時卽飭藩臬兩司轉行各州

縣並遴委熟諳差務之員會同敬謹備辦向例督臣應先期親往

查勘現在臣有洋務經手要件不克分身檄派藩司孫觀馳往東

路遂加查驗督率務期沿途橋道一律堅實寬平以昭慎重該司

卽於二月初八日先赴差次勘辦屆期換約事竣臣仍籲請進京

陛見而聆

聖訓再循例敬謹隨扈自出省後臣衙門日行事件飭委臬司范
梁代行其緊要事務仍包封送臣行次核辦所有赴津籌辦換約
並派員查勘橋道各緣由理合恭摺具陳伏乞
皇上聖鑒謹

奏

滹沱河修復隄壩片

同治十二年二月初一日

再查滹沱河水勢洶湧向由正定府城下經過其靠城西南北三面分設草壩隄埝以護城垣歲需經費係奏明動撥營田工本發商生息解存滹河道庫按時撥用乾隆年間因河流南趨工程可緩疊經停止歲修道光十六年以後復將息銀解儲藩庫嗣又撥解部庫遂致隄壩各工積久廢棄現在草壩已無形跡隄埝坍塌殆盡而近年河流北徙水漲卽浸城根不特民歎其魚城垣亦將不保且於年前閱伍過境查看情形非興復隄壩不可當飭該府縣詳細勘辦並於今春應行調劑摺內聲明在案旋據勘明草壩工費甚鉅縣雖議築所有城西南之斜角隄八百餘丈接連之迴水隄一千六百餘丈均係頂衝且距城切近實資攔護又城西北之酒馬口隄五百餘丈雖相離較遠但地居上游每遇盛漲出槽

水卽漫至城下併請酌量修復等情臣察核所議皆屬必不能緩
之工已飭該府縣趕緊購備料物春融卽便興作所需經費計清
河道庫自同治八年奏銷以後截至十一年十二月初十日止尙
存前項息銀七千九百三兩零卽令儘數動用其有不敷再由官
紳量力捐助以濟要工去年正定一帶河水爲災今值青黃不接
民多困苦應仍以工代撫俾一舉兩得並循去年奏准預提地丁
籌修河道隄工之案一體免造細冊仍責成該府縣核實開支不
准絲毫浮冒事竣將用過銀數彙案開單奏報以符定章至此項
息銀本爲歲修隄工而設現在河流非徙城垣危險異常工程極
關緊要茲雖興復隄埝經費無多尙須逐年加培並將草壩設法
辦理嗣後每年所收息銀應請仍留清河道庫歸歲修木案隨時
撥用以符名實而衛地方理合附片具陳伏乞

聖訓示謹
奏

派員襄辦換約片

同治十二年二月十七日

再臣欽奉正月十八日

諭旨派辦日本換約事宜原定條規二本業經總理衙門發交祇領存俟照辦該使臣去冬照會本有來月下旬啟行之說前據上海委員探稱該使知北河開凍較遲擬於正月杪由日本起程惟迄今未聞到滬確信來津想需時日現值

陵差伊邇臣職司守土義應前驅未便鵬候貽誤查日本使臣副島種臣聲明帶有隨員外務大丞柳原前光等多人將來臣與議辦各事亦須遴派司道大員襄助以崇體制茲查有頭品頂戴前山東布政使潘鼎新歷年統兵蘇滬多與洋人交涉熟悉機宜二品銜津海關道陳欽前奉

旨幫辦日本議約條理精當該員等現駐津門正可就近商辦一

切若臣離津後日本使臣早晚卽至應令潘鼎新陳欽安爲接待
隨時體察情形相機酌辦仍俟臣差旋再遵

旨將上年會議條規互換庶臻周妥所有派員襄辦換約緣由是
否有當伏祈

聖鑒訓示謹

奏

吳煦請建祠周

同治十二年二月十七日

奏爲已故道員在任勩勞卓著據地方紳士公呈懇請

優卹建祠恭摺仰祈

聖鑒事竊據江蘇紳士三品銜前右春坊右中允馮桂芬翰林院
侍讀銜編修潘遵祁等聯名呈稱前署江蘇藩司原任蘇松太道
吳煦於咸豐八年冬閒到任勤政愛民羣情素戴十年四月蘇州
失守松太繼陷賊以大股由西南路攻撲上海閩廣匪徒復於東
北兩門乘亂焚掠該道親駐城堞激厲將勇多方守禦歷七晝夜
賊蹤始退至十一年冬閒浙江省城復失賊由乍浦連陷奉賢金
山川沙南匯東路僅隔一浦西南路之賊亦祇距城數里城外防
兵不戰自潰避難商民奔迫叢集訛言四起一夕數驚惟北門外
西人有自衛之兵尚可互資防守該道謂我弱賊強苟內無重兵

客兵必終不爲我用邀集官紳定議乞援於曾國藩安慶軍次詢者以勢難費鉅莫由措手該道謂時事至此豈遑他顧遂於同治元年春開力籌鉅款雇備輪船由紳士具呈赴皖乞師東下自此軍聲特起人心始安竟以孤注重剛出險長驅削平巨寇東南全局轉機實由於此且上海當極危時餉需萬緊兼濟鎮江該道殫心籌畫不避勞怨以一隅之地每年籌餉至二三百萬綜核鉅細事事躬親竟且達宵轍輿忘寢年市廛艾翳髮頓白積勞成疾實在此時在滬紳民無不共見今聞該道病故紳等追念其力持至計久保餉源有功地方實非淺鮮呈懇奏請

優卹並准於上海地方建立專祠俾申報享等情前來臣查咸豐庚申辛酉之交蘇浙相繼淪陷惟上海彈丸之地岌岌僅存賊蹤近佔環攻殆無虛日臣於咸豐十一年冬開辦奉

諭旨催令統軍赴援惟自皖至滬阻隔數區千有餘里無路能達
若非該道吳煦倡謀集捐雇備輪船迎師東下大局實有莫保之
勢東南亦無恢復之基道臣於同治元年三月抵滬後尤賴吳煦
籌濟餉需聯絡洋兵得以一心併力規復全省該道深明大計力
任艱危其功誠不可泯茲因積勞病故蘇省紳耆感念前功緣臣
與其患難知之最詳合詞籲請

恩卹建祠委係出自至誠允乎眾論臣未敢壅於上聞合無仰懇
天恩俯順輿情准將二品頂戴原任蘇松太道江蘇補用道吳煦
照道員軍營立功後病故例

敕部從優議卹此外尋常勞績仍不得援以為例並准於上海地
方由紳民捐建專祠以昭激勵出自

逾格恩施是否有當伏乞

皇上聖鑒訓示謹
奏

請復永定河工需原額周

同治十二年三月二十五日

奏爲永定河見撥工需委實不敷修防擬請仍復原額恭摺仰祈
聖鑒事竊據永定河道李朝儀稟稱該河水性湍急挾沙擁泥易
淤善潰素稱難治應需工費每年額定歲修銀三萬四千兩修
銀二萬七千兩添辦備防銀二萬五千二百兩加增迎腳銀八千
五百兩共合銀九萬四千七百兩均赴部請領開有另案土工添
補增築咸豐四年因軍需浩繁庫款支絀部議改爲減半歸藩庫
旗租項下按銀鈔各半撥給七年復減耗料銀一千五十兩綜計
歲領實銀不及原額四分之一修防徒有其名工務愈形廢弛同
治三年八年前督臣劉長佑曾國藩先後奏准停止鈔票發給五
成實銀並加撥銀二萬三千兩除扣六分部平等項到工實銀僅
六萬兩有奇工段甚長廢弛又久實不敷用祇能擇要修濬逢汛

搶護其餘應辦各工率多停緩卽如本年甫過凌汛工料已費不貲伏秋大汛萬難爲繼以目下情形而論若欲通工修濬非數十萬金不可然何敢格外議增惟有請復原額以冀逐漸補救等情請奏前來臣查永定河切近

畿郊兩岸隄工共長四百餘里附近十餘州縣農田民生所繫實爲最要之工原額工需本係酌中定議當時隄高河深料價平減已費支持嗣因年需疊議裁減應辦工程遂多無力興辦荒廢日甚整理更難加以連年異漲各汛險工疊出應需加鑲埽段較之昔年多至倍蓰旣未能另請鉅貲大加修濬必須將額款發足俾多領一分銀兩卽多做一分工程近來直省尋常發款已准復額加成此項工需關係尤重相應仰懇

天恩准自同治十二年爲始仍照原額九萬四千七百兩全數撥

領以重要工仍由臣責成該河道督率廳汛核實經理涓滴歸公儻敢稍事虛浮卽行從嚴參辦至此項工需向係由部撥發現時能否一律如舊應請

敕部議覆施行理合繕摺具陳伏乞

皇上聖鑒訓示謹

奏

津郡建曾國藩專祠捐

同治十二年三月二十五日

奏爲津郡紳民籲懇建立已故督臣曾國藩專祠恭摺仰祈

聖鑒事竊據天津道丁壽昌天津府知府馬繩武等詳稱原任大學士兩江總督曾國藩久任東南勦勞懋著同治八年調任直隸正歲歉匪擾之後地方彫敝下車伊始卽以治河練兵飭吏三大端爲務次第舉行民賴以安天津爲諸河下梢海疆要地利益尤多辦理中外交涉事件顧全大局至今咸鑒其苦衷他如清訟獄減徭役勸農桑嚴鍋夥之刑祛鹽務之弊凡有裨於

國計民生無不盡心經營實力興辦委屬有功於民據紳士沈兆澐等聯名籲懇於津郡擇地建立專祠以資報饗由該道府轉詳請

奏聲明所需經費另行集捐等情前來臣查曾國藩前於兩江總

督任內因病出缺輕荷

恩施至優極渥並准於立功省分一體建祠仰見

聖主眷念盡臣有加無已欽感同深其在直隸幾及兩年政績實
多可傳今津郡紳民追念舊德籲懇祠祀出於至誠相應仰懇
天恩俯賜照准以順輿情理合恭摺具陳伏乞

皇上聖鑒訓示謹
奏

江蘇勸辦津賑請獎
同治十二年三月二十五日

奏爲查明江蘇勸辦津賑出力員董繕單擬保恭摺仰祈

聖鑒事竊查同治十年秋間直隸天津河間等屬被水成災經臣
奏明在江蘇等省勸辦捐輸先後捐獲米石棉衣解津賑濟所有
出力各員由臣奏獎在案茲據江蘇布政使應寶時江蘇蘇松
太道沈秉成等詳稱上年奉文勸辦津賑因滬上商業各歸各幫
必須分幫派董酌勸並委員分任其事該員董等心存利濟不辭
勞怨始終奮勉應請分別給獎俾免向隅開單稟保前來臣逐加
覆核除將其次出力員董酌加刪減外所有擬保各員相應繕具
清單恭呈

御覽仰懇

天恩敕部准予照請給獎以示鼓勵理合恭摺具陳伏乞

皇上聖鑒謹

奏

張家口糧臺請撥部餉摺
同治十二年四月初二日

奏為張家口糧臺懇

恩照案續撥部餉恭摺仰祈

聖鑒事前因烏里雅蘇臺伊犁哈密庫倫等處調兵防剿遵

旨任張家口設立糧臺辦理各路軍糧由臣四次奏撥部餉銀十

二萬兩並經奏明該臺辦理軍糧待用孔亟每年僅用銀六七萬

兩於軍情關係極重懇仍撥部餉以資接濟奉

旨著照所請戶部知道欽此茲據口北道奎斌稟稱自同治九年

十二月間設立糧臺先後領過部餉截至十一年年底止共存正

款銀二萬四千七百兩零餘平銀二百十七兩五錢零業已造冊

報銷其原調吉林黑龍江察哈爾馬隊三千四百餘員名應需口

米已於上年冬初運至今年閏六月止所需腳價銀兩係在報銷

存款內動支運今春辦給調赴烏魯木齊之吉林黑龍江馬隊一千一百餘員名裹帶三箇月口糧及駐紮庫倫之宣化古北口練軍裝盛米麪繩袋各項暨雜支各款共已動用銀二萬三千餘兩現僅存銀一千餘兩轉瞬四月下旬牛車陸續開運前經察哈爾都統奏明預運秋冬二季之米查年內烏城續調察哈爾馬隊二百五十餘員名合之原續調各起官兵共四千八百餘員名約需米七千數百石核計米價繩袋等項需銀甚鉅若不請款接濟必誤車運稟請奏撥前來臣覆查該道所稟委係實在情形相應仰懇

天恩敕下戶部照案續撥餉銀三萬兩仍由順天府尹派員領解赴張家口糧臺交收以濟急需所有張家口糧臺續請收撥部餉緣由理合恭摺由驛具陳伏乞

皇上聖訓示諭

日本換約軍事片 同治十二年四月初七日

奏爲日本換約事畢恭摺具陳仰祈

聖鑒事竊日本國使臣副島種臣到津會晤情形業經臣附片具
奏該使商請訂期臣卽擇定同治十二年四月初四日將同治十
年七月二十九日在天津所立修好條規通商章程公同互換屆
期臣率同前山東藩司潘鼎新津海關道陳欽及天津道府通商
委員等齊赴公所該使副島種臣亦率同該國外務大丞柳原前
光少丞平井希昌鄭永甯等前來將日本上諭允准永遠執行之
條規章程正副本兩分齎捧交臣驗收臣卽將總理各國事務衙
門發交恭用

御覽條規章程正副本兩分亦交該使祇領彼此核對無訛臣係
原議條規之人無庸再行畫押日本議約係伊達宗城今但令換

約之副屬種臣於該國上諭篇末添註銜名畫印附釘條約之後以昭憑信而歸簡易除將所換條規章程正副本兩分一併封固委弁齎送總理衙門查收備案外至同治十一年夏間該國曾遣柳原前光等來津議改原約經臣詳細駁斥並批令津海關道陳欽等移知柳原前光俟換約時核辦當即據情專摺

奏明在案茲該使副帶種臣謂約章甫經互換兩國和好日敦無不其相體諒將來照行後如與彼國通行章程有所窒礙再求通融酌辦上年自悔多此一舉今日更不必另生他議等語是其明達大體毫無矯強尙屬可嘉臣諄囑該使嗣後果皆如此公平兩國必無難辦之事至該使去冬寄臣照會有覲奉國書恭伸慶賀之語欽奉

上諭著於換約時體察情形妥慎酌辦該使復於四月初五日來

臣行館曾晤據稱擬於初九日起程赴京拜謁總理衙門王大臣
齋有國書並先錄稿送閱詞意甚屬恭謹惟請

覲一節始終未據提及臣未便探詢致著痕跡想進京後當與總
理衙門商辦謹將日本譯錄國書稿及准行條規章程上諭照鈔
清單恭呈

御覽並緘咨總理各國事務衙門知照所有換約事畢理合繕摺
由驛具陳伏乞

皇上聖鑒謹
奏

謹將日本譯錄國書稿鈔單恭呈

御覽

大日本國大皇帝敬白

大清國大皇帝鑒者兩國俱與泰西各國交通往來而獨兩國未修親善故於去歲簡派親臣大藏卿伊達宗城經與

貴國議定條約已予批准允宜派使互換適聞

大皇帝既成婚且親政朕深歡喜乃特遣外務大臣副島種臣於貴國交換和約併伸

慶賀朕固知種臣堪爲喉舌專令總理各國事務無不代朕擔當言歸於好冀

大皇帝思交誼篤鄰好待該使臣優加仁厚從此兩國蒙慶永久弗渝特茲敬白併祈

大皇帝多福眉壽

明治五年壬申十一月十九日

親筆御諱 國璽

外務大臣副島種臣畫押

謹將日本國准行修好條規通商章程上諭鈔單恭呈

御覽

明治五年十一月十九日上諭曰前閱大藏卿伊達宗城適清國
議立兩國修好條規通商章程等所定各條款已予允准永遠執
行愈敦友誼著外務大臣副島種臣遵照辦理欽此
須遵行各件布告全國府縣大官等一體遵照辦理欽此
神武天皇卽位紀元二千五百三十三年明治六年三月九日外
務大臣副島種臣押

倭使往還禮物片

同治十二年四月初七日

再臣欽奉正月十八日

寄諭本日諭旨一道一併發往如該使索看憑據著另行恭錄給與閱看俟換約事畢此旨仍繳還軍機處備查等因欽此四月初四日互換條約日本使臣因接臣照覆相信無疑並未索看憑據所有片奉

諭旨一道謹卽封固咨繳軍機處備查該國素重贈答之禮換約事畢該使副島種臣專員致送臣處日本書籍鎧甲鞍轡等件並分致襄辦換約大員藩司潘鼎新關道陳欽土物各有差互等緣其情誼周洽只得照案收存仍各自備辦土物若干贈送該使臣以敦友睦合併附片陳明伏乞

聖鑒謹

蘆課奏銷緩期摺

同治十二年四月十一日

奏爲援案請緩長蘆本屆正課奏銷以紓商力恭摺仰祈

聖鑒事竊據長蘆通綱商人屢次具呈連年災歉上年引岸又被水患本重銷滯商力難支懇將同治十二年應完十年正課分作五年帶徵臣以嘉慶道光年間水旱成災雖有分年帶徵課款之案但彼時庫儲充裕今則餉需藉以接濟勢難循以爲例節經批駁並行運司體察情形妥議酌辦去後茲據長蘆鹽運使覺羅成孚詳稱各商課款關係餉需如可周轉萬不容稍存希冀惟蘆商資本無多全賴運鹽納課從前本輕銷暢一年之鹽祇能納一年之課近年災歉頻仍灘坭引岸屢被衝沒生鹽短絀運本極重銷路日滯銀價又復昂貴商力甚形拮据上屆正課奏准展緩至年底甫經辦出奏銷距本屆五月奏銷之限時僅半

年以半年而令納兩年之課其何能支且上屆正課尾欠及未解
帑利正在嚴比勒迫春運踰時運資莫繼若再將本屆正課同時
並徵勢必顧此失彼課運斷難兩全該司悉心體察既未便分年
帶徵貽誤餉需亦未可過於逼迫轉致參懸課絀有礙大局議仍
援照上屆成案將本屆正課奏銷緩至十月以保頽綱等情請
奏前來臣查蘆商連年受災苦累異常上屆正課奏請展緩奉
旨允准不料秋閒又復大水銷路更減資本多虧本屆奏銷爲期
太促力實未逮合無仰懇

天恩俯准照案將同治十二年五月正課奏銷緩至本年十月辦
理俾商力稍紓課運得以兼顧屆時仍由臣督飭該司實力催徵
務使本屆奉撥京奉各餉儘徵儘解以供要需理合恭摺具陳伏
乞

皇上聖鑒訓示敕部知照謹奏

潘鼎新入都片

同治十二年四月十一日

再頭品頂戴前任山東布政使潘鼎新上年秋閒服闋由籍赴京道經天津適值臣往大名一帶閱兵津郡水勢未涸冬防喫緊奏留該藩司暫駐天津督率各營操防彈壓聲明俟今春開河臣回津後再令其赴京
陛見恭候

飭用奉

旨著照所請欽此本年二月間臣籲懇入

覲隨扈

陵差恐日本使臣來津無人接待又

奏派該藩司襄辦換約事宜現在日本約事告竣該司籌辦一切均甚周妥查潘鼎新由舉人從軍十餘年帶隊勦賊於各省地勢

民情閱歷甚深自同治五年在山東臬司任內蒙

恩擢授藩司正臣督辦東西捻逆軍情棘手之時前敵需人未便

檄令赴任該司識力沈毅才具幹練軍事固稱熟手吏治亦甚究

心茲丁憂起復例應進京候

簡臣卽照案飭令剋期北上俾伸報效之忱伏乞

皇上聖鑒謹附片具

奏

福濟捐賑片

同治十二年四月十一日

再上年天津河間等屬水災較重經臣

奏明勸捐賑濟各省官紳捐助銀錢衣糧疊次核准給獎在案茲查有已革頭品頂戴

賞戴花翎前烏里雅蘇臺將軍福濟報捐銀一千兩業飭籌賑局司道兌收搭放該前將軍回京養病近況聞甚拮据而體念時艱效忠好善之忱老而彌篤當咸豐四五年間福濟爲安徽巡撫臣曾從事於廬州軍營深悉其廉勤勵已慈惠愛民卽同治九年冬賊擾烏城雖疏防堵實因兵力過單仰蒙

恩宥僅予革職留任嗣以錦丕勒多爾濟挾嫌參奏榮全含混查覆遂邀罷斥究之該城旋即收復其情不無可原茲緣近畿水患竭力拯助臣不敢壅於上

聞惟福濟曾任大員宣力中外幾四十年應如何優給獎敘之處
出自逾格

恩施理合附片陳請伏乞

聖鑒訓示謹

奏

淮軍西征報銷摺

同治十二年四月十一日

奏爲淮軍西征軍需自同治九年四月起至十年十二月底止收支款目造冊報銷恭摺仰祈

聖鑒事竊照同治九年三月底止軍需用款業經劃清列爲勦捻尾案報銷並聲明九年四月起歸於西征另案報銷於同治十年八月初一日由前任兩江督臣曾國藩繕摺會

奏奉

旨著照所請該衙門知道單二件片一件並發欽此欽遵在案茲

查九年二月臣奉

命赴陝西督辦援剿事宜當因西北地勢平曠回騎飄忽非馬步兼用不能得力飭郭松林周盛傳趕募武毅盛字各起馬隊帶往助剿一面將後路餉需轉運等事妥爲籌畫並念備調各軍遠道

從征籌餉欠餉以示激勸是年六月臣又遵

旨移緩就急酌帶親軍各營馳赴近畿一帶駐紮先經派員在湖北省城設立糧臺續於揚州添設糧臺分局以爲後路收撥餉械總匯之所初由襄陽荆紫關龍駒寨入陝繼改清江張秋各處分設轉運局節節提解行營以供支應是年九月前任直隸提督劉銘傳欽奉

諭旨督辦陝西軍務統帶原部銘軍馬步二十八營分撥武毅步隊十營楚軍馬勇二營應需糧餉軍火等件經該提督奏明由臣隨時會商兩江湖廣各督臣籌撥接濟所用正雜餉項至十年十二月止統歸臣查核報銷所有淮軍除提督吳長慶統帶慶字親兵八營提督劉玉龍開花礮隊一營原飭整備調陝迨移師赴直仍令駐防江蘇應撥歸蘇省留防軍需案內彙銷此外原募餉添

馬步各軍自九年四月起及隨征護迎督標親兵銘字春字水師等營九年正月起並調隨銘軍赴陝之總兵徐邦道楚軍馬隊二營十年正月起改由淮軍糧臺支餉俱歸此案報銷以上營哨官弁員名勇夫總數征防處所業經按季造冊分咨軍機處暨戶兵二部備查至馬步水陸各營薪費口糧正雜等項一切均照舊章仍依楚軍刊本營制並奏定章程及准銷成案分別造報惟因地用兵情形稍異其購買駝騾采辦米糧物料製造軍裝器械工價開差雇用船車騾頭等款因各處市價不同隨時酌定核給購買馬匹係照陝西直隸兩省驛馬例價分別支銷轉運雇用車輛駝騾夫役價腳等項按照斤重及程途里數例價核實給發均屬實用實銷飭將截至十年十二月止收支細數趕緊分晰造報今據直隸藩司保觀安徽補用道石楷江蘇題補道凌煥等詳稱舊管

無項兩年新收項下綜計山東浙江四川等省協餉並提撥湖北江蘇藩關釐局軍餉兩淮鹽釐及本案准勇支領米糧核抵月餉列收銀款同扣存平餘等款其銀七百六萬四千七百九十九兩七錢有奇又

奏撥福建船局購辦運津米石概留江安糧道起運江北河運餘米晉省采購米麥粳豆共計三萬七千八百五十一石二斗零內登除各款共銀八千八十三兩四錢有奇本色米糧三萬七千八百五十一石二斗零又附列專冊請銷補放淮軍馬步各營同治九年三月底以前欠餉銀四十八萬八千九百一十二兩一錢有奇又本案附請專案

奏銷洋鎗廠隊教習辛工等款兩冊共銀三十萬九千九百六十四兩五錢有奇實計收用銀六百三十五萬七千八百三十九兩

五錢有奇開除正雜各款遵照部議酌定軍需報銷章程各歸各部核銷計應歸戶部核銷銀五百四十三萬四千七十七兩有奇應歸兵部核銷銀二十一萬四千四百七十二兩二錢有奇應歸工部核銷銀二十一萬一千六百三十四兩一錢有奇統共請銷銀五百八十六萬一百八十三兩四錢有奇實存銀四十九萬七千六百五十六兩一錢零內有十年冬季先後撥解提督曹克忠由津赴陝募勇並接統銘軍次年頭二兩關糧餉正雜等項三十餘萬兩統歸於同治十一年次案舊管項下滾接造報等情具詳請

奏前來臣伏查此次造報淮勇馬步水師各營勇丁遵照部咨開報花名清冊正雜款項概發湘平折實庫平報銷仍扣雜款一分平餘均係循照歷辦成案實用實銷並無絲毫浮冒除將細冊分

咨各部並飭以後用款趕緊接續清理造報外謹將淮軍西征軍需收支款目造冊報銷緣由專摺具奏並繕清單恭呈

御覽伏乞

皇上聖鑒敕部核復施行謹奏

謹將同治九年四月起截至十年十二月底止淮軍西征軍需收支正雜各款繕具清單恭呈

御覽

計開

舊管

無項

新收

一收山東省協餉共撥解銀三十六萬兩

一收浙江省協餉共撥解銀三十五萬兩

一收四川省協餉共撥解銀三十四萬兩

一收山西省應解京餉奏留抵辦米糧銀五萬兩

一收湖北軍需局提撥湖北捐餉局米折捐輸銀六萬五千八百

二十兩六錢六分五釐二毫

一收湖北軍需局其提撥沙平銀六十一萬二千兩合湘平銀六十一萬一千五百七十一兩六錢

一收湖北江漢關其提撥四成洋稅庫平銀四十二萬兩合湘平銀四十三萬四千四百四十八兩

一收湖北江漢關其提撥六成洋稅關平銀六十三萬兩合湘平銀六十四萬五百八十四兩

一收蘇州藩司庫其提撥銀三十八萬兩

一收江南海關其提撥銀一百二萬四千一百二十四兩八分七

釐一毫

一收江蘇捐釐總局其提撥釐捐銀一百三十七萬四千五百五十八兩四錢五分六釐八毫

一收兩淮運司庫共提撥銀三萬四千兩

一收鄂岸鹽釐共提撥銀二十七萬九千六百七十五兩七錢四分四釐七毫一忽二微五纖

一收湘岸鹽釐共提撥銀十一萬三千五百兩

一收西岸鹽釐共提撥銀九十三萬九千七百三十八兩一錢一釐

釐

一收皖岸鹽釐共提撥銀二萬一千三百六十三兩四錢一分

一收本案淮軍各營支領本色米糧三萬七千八百五十一石二斗二升三抄一撮共計用抵月餉列收湘平銀十萬五千三百七十四兩八錢六分三釐四毫一絲二忽五微

一收本案轉運價腳采辦製造房租等項共扣存平餘銀二千八百一十一兩六分三釐四毫六絲三忽

一收奏留福建船局購辦運米一萬九千一百三十四石六斗
一收截留江安糧道起運江北同治八年分河運內餘米三百石
一收木案晉省采辦米麥麴豆共一萬八千四百一十六石六斗
二升三抄一撮

以上新收共庫平銀五百三十三萬五千五百九十一兩五錢二分八釐二毫六絲四忽二微五纖

湘平銀一百七十九萬一千九百七十八兩四錢六分三釐四毫一絲二忽五微折合庫平銀一百七十二萬九千二百八兩二錢五釐五毫五絲一忽

共計庫平銀七百六萬四千七百九十九兩七錢三分三釐八毫一絲五忽二微五纖

又米麥麴豆共計三萬七千八百五十一石二斗二升三抄

登除

一撥放安徽壽春鎮總兵郭寶昌所部卓勝軍隨營官并薪糧應歸皖省入收造報湘平銀二千兩

一撥放楚軍馬隊騎左騎右兩營各添中哨一哨同治九年十二月底以前糧餉等項應歸鄂省入收彙總造報湘平銀一千七百六十八兩九錢二分一釐八絲四忽

一撥放天津資遣游弁散勇自同治九年閏十月起截至是年十二月底止陸續資遣游弁散勇已將員名支數遵照部咨專案分晰彙開清冊咨送戶兵部核銷湘平銀四千六百八兩

一附列本案專冊請銷補放淮軍馬步各營同治九年三月底以前欠餉銀四十八萬八千九百一十二兩一錢二毫六絲八忽

一附列本案第一冊請銷淮勇陸軍各營洋鎗礮隊教習通事工

匠人等辛工等項銀三萬九千七百六十二兩五錢七分九釐四毫五忽

一附列本案第二冊請銷製造西洋礮火各局工匠料物並購買外洋軍火價值等項銀十七萬二百一兩九錢六分六釐八毫八絲八忽

以上登除並附列請銷各款湘平銀八千三百七十六兩九錢二分一釐八絲四忽折合庫平銀八千八十三兩四錢九分三毫八絲三忽庫平銀六十九萬八千八百七十六兩六錢四分六釐五毫六絲一忽共計庫平銀七十萬六千九百六十兩一錢三分六釐九毫四絲四忽

又撥放淮軍各營支領本色扣抵月餉應除米麥麴豆三萬七千八百五十一石二斗二升三抄一撮

實計收用庫平銀六百三十五萬七千八百三十九兩五錢
九分六釐八毫七絲一忽二微五纖

開除

一第一冊請銷准軍原募續添馬步各營統領營哨官弁勇夫薪糧等項內歸戶部核銷薪費口糧馬乾等銀四百六十三萬七千一百三十兩二錢六分九釐一絲三忽歸兵部核銷例補馬價銀一萬八千九百一十五兩三錢七分一釐九毫九絲六忽

一第二冊請銷督標春字銘字水師各營營哨官弁勇丁薪糧等項係歸戶部核銷銀十三萬二千七百二十四兩二錢五分九釐三毫八絲四忽

一第三冊請銷隨營辦事支應各差京外文職官員薪糧等項係歸戶部核銷銀六萬八千四百三十七兩一錢三分二釐一毫四

忽

一第四冊請銷隨營先鋒差遣武職官弁薪糧等項係歸戶部核銷銀五萬四千五百八十七兩八分八釐六毫八絲一忽

一第五冊請銷武職各員在營借支養廉係歸戶部核銷銀七千七百一十九兩七錢七分二釐二毫六絲七忽

一第六冊請銷淮軍馬步各營柴草油燭折價駝騾購車喂養車輛雇價等項內歸戶部核銷柴草油燭折價駝騾購車喂養等銀三十八萬一千八百八十三兩二錢三分八釐四毫四絲五忽歸兵部核銷車輛雇價銀七萬九千八百三兩一錢四分五釐八毫七忽

一第七冊請銷淮軍馬步水師各營官弁勇夫傷亡病故受傷卹賞係歸兵部核銷銀一萬二千四百三十五兩五錢八分八釐一

毫五絲

一第八冊請銷援陝訓直開差雇用船隻車騾夫料價腳等項係歸兵部核銷銀一萬二千六百一十二兩五錢六分三釐九毫二絲九忽

一第九冊請銷解駝官弁牧丁薪糧路費購買駝騾馬匹價值喂養夫工等項內歸戶部核銷薪糧路費駝騾價喂養等銀八萬九千九百八十八兩七錢四分七釐八絲一忽歸兵部核銷馬價夫工等銀一萬九千八十八兩七錢七分七釐三毫八絲一忽

一第十冊請銷各臺局所雇備轉運長船夫役短車夫工騾價腳力鹽菜等項內歸兵部核銷船車夫工騾價腳力等銀七萬一千六百一十六兩七錢五分六釐七毫三絲歸戶部核銷鹽菜銀一百一十七兩二錢九分一釐三毫二絲五忽

一第十一冊請銷采辦米麥麵豆等項價值係歸戶部核銷銀六萬一千四百八十九兩二錢五分六釐

一第十二冊請銷采辦物料製造軍裝器械工價並水師船隻油艙經費等項係歸工部核銷銀二十萬五千六百八十一兩六錢六分八釐二毫一絲八忽

一第十三冊請銷各臺局所租賃房價係歸工部核銷銀五千九百五十二兩五錢二分三釐四毫

以上第一冊至十三冊止其歸戶部核銷銀五百四十三萬四千七十七兩五分四釐歸兵部核銷銀二十一萬四千四百七十二兩二錢三釐九毫九絲三忽歸工部核銷銀二十一萬一千六百三十四兩一錢九分一釐六毫一絲八忽
統計十三冊其請銷銀五百八十六萬一百八十三兩四錢

四分九釐九毫一絲一忽

實在

存銀四十九萬七千六百五十六兩一錢四分六釐九毫六絲二微五纖

查前項實存內有十年冬季先後撥解提督曹克忠由津赴陝接統銘軍糧餉等項銀三十餘萬兩統歸於同治十一年舊管項下滾接造報理合聲明

一同治九年四月起截至十年十二月底止其欠發淮軍陸勇各營餉銀四十九萬一千三百七十二兩九錢七分九釐二毫二絲二忽

一同治九年正月起截至十年十二月底止其欠發淮軍督標水師各營餉銀八千一百八十七兩九錢五分

以上共欠發餉銀四十九萬九千五百六十兩九錢二分九釐二毫二絲二忽續有補給銀款另歸次案專冊開報理合登明

外洋軍火教練用款片

同治十一年四月十一日

再查剿捻軍需尾案內洋鎗礮隊英法兵官教練各營薪糧係截至同治八年十二月底止其淮軍陸勇各營教習通事工匠人等辛工並采辦外洋軍火價值製造西洋礮火工料等項截至九年三月底止用款業經前任兩江督臣曾國藩戶開清單附奏請銷奉

旨覽欽此欽遵在案今除駐防松滬教練各營薪糧等款歸於江蘇留防軍需另案附銷外所有同治九年四月起淮軍陸勇西征各營洋鎗礮隊教習通事工匠人等辛工及製造西洋礮火各局工料購買外洋軍火價值等項均截至十年十二月底止其請銷銀二十萬九千九百六十四兩五錢有奇茲據直隸藩司孫觀等按款復加查核均係奉文飭發並無浮冒戶造細冊詳請附

奏請銷前來臣查前項淮軍陸勇各營洋鎗破隊教習通事工匠人等辛工各款皆與洋人交涉無例可循仍應專案核實請銷除將細冊咨送總理衙門戶兵工部查核外謹繕清單恭呈御覽伏乞

皇上聖鑒謹奏

御覽

謹將淮軍西征軍需案內附銷陸勇各營洋鎗礮隊教習通事工匠人等辛工等項自同治九年四月起截至十年十二月底止支放各款繕具清單恭呈

計開

一支放淮勇陸軍各營洋鎗礮隊教習通事工匠人等辛工等項銀三萬九千七百六十二兩五錢七分九釐四毫五忽
一支放製造西洋礮火各局工匠料物並購買外洋軍火價值等項銀十七萬二千一兩九錢六分六釐八毫八絲八忽

以上共支放銀二十萬九千九百六十四兩五錢四分六釐二毫九絲三忽提用撥款歸於淮軍西征軍需止案彙總開

報理合聲明

軍需用款增減例案片

同治十二年四月十一日

再十一年十一月內臣附陳淮勇軍需用款遵照部章先行奏明立案奉

旨該部知道欽此嗣接兵部咨此次援剿陝西調防直隸所有購買馬匹自應照陝西直隸營驛定價分別辦理至轉運雇用短車馱騾腳價等項亦應將何項與例案如何增減之處縷晰條分詳細具奏俾將來報銷時有所稽等因臣查淮軍西征軍需耗銷一舉購買馬匹係按照陝西直隸兩省驛馬例價支銷各局所轉運軍火糧餉等項除長船一項循照剿捻奉部准銷成案支給其短雇車騾腳價格遵軍需則例分別斤重程途里數詳細造報至運搬短夫例載日支工價銀八分口糧米一升今酌給工價銀一錢不支食米按銀米合計尙屬無浮惟臣奉

命督師援陝復遵

旨移緩就急酌帶各軍馳赴近畿一帶所有兩次開差隨帶行營辦事差遣支應京外文職各官先鋒員弁抽調護衛親軍小隊勤勇匠役人等並文卷軍械軍火鍋帳行李製造機器什具料物先由湖北省城水路赴襄陽以達荆紫關起旱至西安山路崎嶇大隊由襄陽旱路進發嗣又山陝取道山西馳抵直境均屬軍情緊急之際倉卒啟行所雇船車馱騾就地覓雇一時難齊並飭鄰封州縣分投代雇以期迅速水路船隻無論裝載何項不計斤重程途里數以及乘坐人數多寡均按其大小酌定水手名數以四名至十二名不等自受雇起至卸載止每名日支銀一錢並不另支口糧米食船價緯夫悉在其內查軍需例載每員名每百里給銀三分軍裝行李每百斤百里給銀一分逆水每五員名給緯夫二

名軍裝行李一千五百斤給繹夫一名每名給銀五分又例載順水每石每站給水腳銀三分六釐逆水給銀七分順水一百里爲一站逆水八十里爲一站等語核與例案比較支數有減無增陸路車輛不論斤重里數湖北河南山西三省雇到之車三套者每輛日支銀一兩二套者日支銀七錢陝西雇到者不論套數日支銀六錢坐價均酌給減半查例載河南每車百里給銀一兩陝西每車百里給銀四錢五分其餘各省均照驛站定例每車百里給銀一兩等語此次開差必須車輛雇齊方能遞發係分行坐價支給尙與例價無浮惟陝西所雇之車每輛日支銀六錢與例稍增至騎馱騾頭每項日支銀三錢坐價減半並不另給回空盤費查例載如山路陡險車輛難行雇用馬騾馱運之地照運糧例每一百三十斤給馬一匹或騾一頭每匹頭給腳價銀三錢等語核與

例價相符以上開差雇川船車馱騾共請銷湘折庫平銀一萬二千六百一十二兩有奇均係實用實銷並無冒濫臣視師十餘年深知籌餉艱難於一切支應無不力求撙節歷年動用各款核與例案節省良多共有一二款項與例微有加增實因地方情形不同未能一概繩以成例謹附片陳明伏乞

奏
聖鑒敕部查照謹

津郡改照練軍營制摺 同治十二年四月二十三日

奏為津郡洋鎗礮隊酌照直隸練軍步隊營制改設營哨以節餉需而期經久恭摺仰祈

聖鑒事竊查同治七年因津郡海防緊要募足洋鎗隊五營洋礮隊一營歸天津鎮總兵陳濟清統帶共計官弁兵勇三千二百餘員名應需薪水口分馬乾公費衣帽等銀由海防支應局照章核發分年造銷在案嗣經陸續派撥留防綏遠城官二員兵八名派赴奉省官二員派赴科布多城官二員兵勇十名撤歸大沽礮臺兵一百八十名又撥往大沽礮臺駐紮官四十八員兵七百名現存津城官弁兵勇二千二百餘員名各營均掣動隊伍未能整齊上年七月間經臣改派記名提督吳雲集接統帶往城東紮營挖濠布置操防據該提督稟請酌照直隸練軍改定營制期與保定

大名正定通永各軍聯絡一氣臣以當此經費支絀籌餉難於籌
兵使整頓營制而餉需未能應手練兵終難得力飭海防支應局
司道通籌全局務與原領月餉有減無增以期餉不虛糜事可經
久茲據該司道等會詳現存津城洋鎗礮隊原領月餉並夏冬兩
季衣帽每年共應支銀十四萬餘兩茲改照直隸練軍新章若就
原練之兵無所損益轉得就原領之餉量予減裁實爲海防經久
至計擬請將現存兵勇編立四營三哨仍照舊制設立文武翼長
各一員俾資訓練所有弁兵薪糧公費柴草伙夫長夫等項均照
會同藩奏定練軍章程核給其從前原領洋馬大馬暨挑練馬隊
各馬乾留津京營官弁總統隨帶文武員弁人等並鎗礮公費一
併刪除查兵部議擬直隸練軍營制詳明此後應行變通之處隨
時斟酌損益奏明辦理等語查營制內開每營劈山礮礮車二輛

洋開花礮礮車二輛茲與該統領吳雲集籌商擬專以中營爲礮
隊於原練洋礮內挑選洋開花礮三十尊配用礮車三十輛拉車
馬九十匹又酌留差馬十匹以資哨探計其馬一百匹每匹月給
乾銀三兩無事則團聚一營演練較爲得力遇事則酌量分發防
剿亦不誤要需又查淮勇各營開花洋礮向有礮費大沽礮臺亦
有演礮經費奉部准銷該軍開花洋礮三十尊擬每尊每月酌給
用費銀三兩六錢以後洋礮如有續增用費照加又津郡濱臨大
海嚴冬朔風飄勁該兵勇分段巡夜通宵達旦寒苦異常且係通
商重地華洋雜處若禦寒無具不足以壯軍容向例夏冬兩季每
名每季給衣帽銀二兩五錢茲據裁去夏季酌留冬季每名核減
銀一錢五分以示撙節以上三事比照練軍章程稍有變通於海
防實大有裨益又營制內開練兵底餉應由藩司扣出概交練軍

統領與練餉一併支發等語茲查調製津軍之津通兩鎮標弁兵各底餉除乾銀朋扣合米折計之每年實應領銀一萬三千九百五十餘兩應由該統領照章赴藩司請領與練餉一併支發仍由支應局於該軍應領餉銀內按季扣除通盤核計改章之後較洋鎗礮隊原領月餉每年可節省銀九千六百餘兩似與操防經費均有實濟其動撥餉銀仍歸海防案內造銷詳請核

奏前來臣遂加覆核所議各條如酌留異長專設礮營添給礮費核給冬季衣帽銀兩雖較直省練軍定章稍增而於海防練兵實不可少且通盤核計應領餉銀較原領月餉減九千六百餘兩尤為變通得法除批飭照辦外理合恭摺具陳伏乞

皇上聖鑒訓示敕部知照謹
奏

海防支應局報銷摺

同治十二年四月二十三日

奏為查明天津海防支應局十一年分收支餉需按款分造清冊請

旨敕部核銷恭摺仰祈

聖鑒事竊據天津支應局長蘆運司暨羅成孚津海關道陳欽天
津道丁惠昌會詳津郡辦理海防應需原練續練新練之洋鎮礮
隊挑練馬隊通永鎮標大沽協標等營馬步兵雲字營馬隊暨
調防歸綏直字營馬勇餉乾等銀向於津海關六成洋稅洋藥釐
捐東海關協餉長蘆鹽斤復價各項下隨時籌撥按照厯辦章程
撙節支放所有同治十年分收支款目業經分造清冊詳蒙
奏咨准銷在案茲查金陵製造礮局仿造西洋水雷委差弁二員
解津備用並留該弁演練每員月給薪水銀十六兩天津軍械所

收解外洋軍火事務殷繁詳蒙批准月給公費銀二十兩十一年
二月開兵部議覆大沽海口酌定營制將該營官弁俸餉銀兩自
二月十二日奉

旨之日起按照新章支領其酌留看守礮船之大沽營千總一員
兵十名奉撤回營應支薪糧卽於三月停支天津營務處原設聽
差八名五月開悉行裁汰其營務處護衛親軍五棚留備津郡巡
防調歸支應局改照練軍口糧自五月初一日接支直字營馬勇
分撥游擊劉長春管帶一哨計五十員奉文遣撤應支薪糧於
七月初一日停支迨八月開提督鍾邦喜巡查津郡嚴緝游勇月
給油燭銀八兩洋鎗礮隊前後兩營於九月開移營築壘比照成
案共添雇伙夫一百一名每名月支銀三兩又津郡冬防緊要奏
留前山東布政使潘鼎新暫駐天津會督操防按月撥給薪水銀

兩自十月初一日起支其派赴科城教習內無底餉兵勇八名仍按季比照戰糧每名月給銀一兩三錢以資養贍家屬調防歸綏之直字前後兩營馬勇並留綏遠之津標洋礮隊酌加餉乾等項按三箇月撥解一次又天津營務處爲諸軍總匯蒙派候補道員會同總理該處差遣文武並辦理通商文案及經理鹹水沽稻田委員應支薪水均照章按月核給現將收支各款截清日期造具細數清冊詳請

奏咨前來上遂加覆核計自同治十一年正月初一日起截至十二月三十日止共收過津海關洋稅洋藥釐捐東海關協餉鹽復價等項銀三十八萬五千兩共支過官兵勇隊薪水口糧俸廉餉乾公費及現任各官借支養廉委員薪水聽差護局夫勇渡夫工價米折口糧看守藥庫弁兵薪水口分洋鎗礮隊並挑練馬隊

公費大沽海口礮臺演礮經費兵丁衣帽棺木建築洋鎗礮隊營
盤土城礮臺官廳兵房添製帳房旗幟號褂及一切軍火子藥等
項運送軍火委員盤費騾腳局書工食油燭紙張租賃民房等項
遵照部定章程應請戶部核銷銀三十三萬九千八百九十五兩
八錢八分一釐九毫六絲九忽七微工部核銷銀四萬五千九百
九十九兩四錢四分四毫三絲六忽二微二共應銷銀三十八萬
五千八百九十五兩三錢二分二釐四毫五忽九微內除本案內
扣收平餘銀四百六十兩二錢二分八釐四忽二微儘數動支外
計不敷墊支銀四百三十五兩九分四釐四毫一忽七微均係隨
時籌墊並承辦各員請領未發之款俟奉准部覆後再行分別辦
理除清冊咨部查照外所有查明海防收支餉需銀兩造冊請銷
緣由理合恭摺具

奏伏乞

皇上聖鑒敕部核銷謹

奏

奏留李興銳摺

同治十二年四月二十三日

奏為直隸吏治需員懇

恩仍將知府李興銳留直差委以資佐理恭摺仰祈

聖鑒事竊查道員用准補大名府知府李興銳前因母病未痊請假赴江甯寓所省親經原任兩江督臣曾國藩奏請開缺留於兩江差委奉

旨俞允嗣准部咨以李興銳係現任人員應比照終養開缺之案准在江甯養親留於兩江差委俟養親事畢照例坐補原缺等因在案上年十二月間臣以金陵差務較緩直隸委用需人奏明檄調該員迎養到直並請免其坐補原缺仍以道員留直補用奉旨吏部議奏欽此旋准吏部查與准其開缺養親原案未符所請應無庸議等因覆奏奉

旨依議欽此知照前來臣查李興銳前此辭職奉親原因母病未痊不能遠道就養與呈請終養者實有區別吏部因實缺人員例無請假明文比照開缺養親辦理亦與例應終養人員不同茲查該員之母舊恙久痊上年經臣奏調已迎養到直伊母今年六十九歲又有胞弟三人非獨子可比該員籍隸湖南其寄寓金陵與服官直隸同一侍養既已遠道迎養而來若仍令折回長途跋涉往返多勞揆諸人子孝養私心亦有不忍況該員係直隸曾任實缺人員臣忝任畿疆凡地方吏治河工海防軍務諸大政方冀集思廣益力求振作以挽頽風本年

親政之初欽奉

諭旨如有賢能出眾之員卽行隨時保奏用備任使等因仰見我皇上勤求政治儲育人材至意竊維爲政之要首在得人該員李

興銳條理精密血性過人前在曾國藩軍中調和將士節慎餉糈不避險難不辭勞怨其辦事久著成效若使得所展布必不愧賢能之選卽部臣於議覆疏中亦謂臣奏調該員係因需人差委惜才可用起見茲該員迎養回直有以遂其孝思亦得以盡心民事於忠孝似屬兩全合再仰懇

天恩俯念人才難得可否

敕部將該員前次比照終養原案註銷准其仍回直隸原省差遣委用至臣前請以道員留直補用一節既經部議恐啟擇缺規避之端自應遵照將李興銳仍留直隸坐補大名府知府原缺以符定制如蒙

俞允則有用之才得以及時自效臣亦藉收指臂之助實於治理有裨臣爲吏治需人起見是否有當理合恭摺具陳伏乞

皇上聖鑒訓示謹

奏

橋道經費請發十成摺

同治十二年五月十一日

奏爲州縣恭辦橋道經費請發十成實銀以昭慎重恭摺仰祈
聖鑒事竊據藩司孫觀詳據大興宛平通州三河薊州遵化豐潤
玉田良鄉房山涿州易州涇水等十三州縣稟稱該州縣等恭辦
兩陵大差沿途橋道經費向例發給十成實銀咸豐年間軍需煩
鉅改發一半鈔票當時銀鈔並重行戶照章領用尙可周轉今年
三月恭逢

皇上祇謁

東陵大差因鈔票停止前項經費按藩庫現行章程僅折發六成
實銀每兩遽減四錢行戶不肯領辦查搭蓋橋座涵洞以木植秫
秸爲大宗平填道路修理地盤以夫役土方爲大宗近年連遭災
歉料物短缺價值倍增又須他處購買運腳重加夫役窮苦土方

工價必應發足俾資餬口萬難絲毫剋減其他一切用物均須市價采辦當此物力維艱卽發十成實銀尙難敷用折發六成實屬賠累不支惟有請復向例等情由司核議具詳前來臣查該州縣等前在差次具稟因差期緊迫當飭先行籌墊一面批司核議茲據來詳委係實在情形且自停鈔以後直省各屬驛站工料均經改發十成實銀況大差橋道爲盤輅所經非尋常驛務可比若仍折發六成不特州縣賠墊過多更恐臨時藉口貽誤相應仰懇天恩准將本年三月大差並嗣後恭遇

皇上祇謁

兩陵應需橋道經費均照向例按十成實銀撥發以昭慎重而示體卹謹會同兼管順天府府尹臣萬青藜順天府府尹臣彭祖賢

恭摺具陳伏乞
皇上聖鑒訓示謹
奏

修築滋河瀕龍河隄摺

同治十二年五月十一日

奏爲修築滋河瀕龍河隄工完竣情形恭摺仰祈

聖鑒事竊查保定西南無極深澤祁州地面有滋河沙河唐河三道皆發源山西會於祁州之三岔口爲瀕龍河逕安平博野蠡縣高陽而達西淀滋河來源較旺北高南下向築南隄瀕龍河挾三水以恣奔突勢益湍急故有南北隄以束之乃年久失修隄形卑薄過甚自滹沱河山禁城深澤一帶北徙距瀕龍河僅一二十里或數里不等伏秋盛漲彼此衝決灌溢匯爲一片附近二十餘州縣疊受其災且滹沱渾流乘勢入淀較大清河之壅淤更甚西淀爲上游西南北諸河要津一被淤填尤害全局臣屢經察訪滹沱無收束之法必須盡力於滋河瀕龍河南隄以障滹水而衛農田而瀕龍北隄及下口去路亦關緊要上年秋後飭據清河道葉伯

英於議疏西淀之際卽至各該州縣妥細履勘內高陽已先令堵築決口外其自無極合流村起歷深澤祁州安平博野蠡縣至高陽止計滋河南隄潞龍南北隄共四百數十里半係缺口險工應分別堵築加培高厚因地制宜定爲頂寬一丈五尺至二丈底寬三丈至三丈五尺高八九尺並開通下口入淀之路以期全河暢流不少阻滯已於預撥庫款以工代賑摺內陳明大略在案旋經該道會同藩臬兩司籌議章程二月間葉伯英親督開工卽委各員認真將事紳民鑒於前害按戶出夫實力趕辦遠近災黎咸獲備趁餉口兩月之內全工告竣復經該道逐細驗收丈尺半過原估均已夯礮堅實其決口險要工段一律密釘排椿鑲墊梢料或添築戢壩增做月隄子埝並堆列土牛栽種柳樹以資捍禦至入淀下口節節打壩厚水挑泥尤費工力從此本河順軌外水不侵

按時修防可爲久遠之利第兩岸工長四百餘里各境土方各十數萬災歉之餘民情踴躍甚屬可嘉其官紳尤爲出力者可否容臣擇保數員以示獎勵伏候

聖裁除飭妥辦善後事宜並將此外隄河各工迅速辦理外所有修築滋河瀦龍河隄工完竣情形理合恭摺具陳伏乞

皇上聖鑒訓示謹
奏

永定河工請照額撥款摺

同治十二年五月二十八日

奏爲永定河工程喫緊核減領款實不敷用擬仍籲懇

天恩俯准照額發給藉資補苴而防險要仰祈

聖鑒事竊查永定河水性湍急挾沙衝壟易淤善潰素稱難治自設隄工以來歲需修費疊次加增至嘉慶年間每年赴部額領歲搶修及備防稽料加增運腳等款共計銀九萬四千七百兩並於額款之外閒有另案土工以資培築乃自咸豐三年以後軍務浩繁庫款支絀部議減銀復行減料以致河務由此廢弛迨同治年間前督臣劉長佑曾國藩因修防竭蹶先後奏准部覆照額減半給銀每年加撥銀二萬三千兩除扣去六分部平等項每年祇領六萬五千餘兩此款內尙應撥出疏濬中洪下口銀一萬一千數百兩兩岸修防備料實只五萬三千兩有奇在當時隄高河深百

務未廢以此給領尙難支持奈久廢之餘河患日深無處不應整頓添工加料卽照當年額領之數猶慮不敷年來限於經費祇能擇其萬難緩者稍事補苴其餘應辦工程率多無力興舉每致大汛搶險料無多儲動輒棘手近年異漲各汛險工疊出較之昔年多至倍蓰雖屢蒙

恩准撥帑修築其通工隄埝仍須擇要加培以防新險如欲將應辦各工一一整理非歲有數十萬金不能應手前據永定河道李朝儀以工程喫緊稟請核辦不得已據情請復舊額使工用稍資周轉廢河逐漸挽救並非藉此卽可足用也昨准戶部議覆以旗租指撥多款部庫自顧不遑仍令照章撥給等因臣久歷時艱深知辦款不易豈敢稍任浮費無如工程實在緊要每年僅以扣平之六萬餘金將就敷衍未免顧此失彼更糜帑項再四籌維惟有

仍懇

天恩俯念永定河險工日多領款過少准自同治十二年起將歲
搶修等銀照從前九萬四千七百兩原額撥領無庸核減其每年
加撥之二萬三千兩卽無須另籌應行疏濬中洪下口亦由此額
款內辦理綜計每歲僅增銀二萬四千餘兩責成該河道認真修
堵先事綢繆於河務民生大有裨助如蒙

允准所有本年應需各項除部撥旗租及加撥銀兩外尙應找發
銀二萬四千餘兩部庫既無款可籌刻下旗租亦難籌此鉅款擬
將兩江督臣解到南河裁款銀二萬兩儘數撥給尙不敷銀四千
兩餘飭令藩司在於旗租項下勻撥以資應用嗣後歲修之款除
動用本省旗租外再由兩江督臣照案迅速妥籌協撥勿任短缺
但應否由此兩款內通融撥或俟庫款稍充循舊由部請領之

處仍由臣按年咨部核辦至本年加撥銀二萬三千兩前經臣於
練餉項下借撥奏明俟江南解到款項歸還今永定河瞬屆汛漲
需款甚急擬將江督解到之二萬兩湊撥其前借練餉之銀無項
歸補應卽就款開銷臣爲工程緊要領款實不敷用請仍照原額
給領以防新險起見謹恭摺覆陳伏乞

皇上聖鑒訓示遵行謹
奏

部請變通摺

同治十二年五月二十八日

奏爲部請行取較多勢難盡歸捐辦擬請量爲變通恭摺仰祈
聖鑒事竊據藩司孫觀詳稱直省奉工部行取硝斤向係分攤各
州縣采買並不給價該州縣等或派之商民或自行捐辦各有定
章然從前兩三年中行取一批並非歲所常有尙能依期解送自
咸豐初年軍興以後漸增至一年一批甚至一年兩三批行取既
多仍歸捐辦官民力何能支且近年產硝州縣疊被水患硝數奇
絀價值益昂采買更爲不易卽如同治十一年奉取雙批屢次嚴
催迄無一處報解若照部議飭取職名不特參不勝參徒滋藉口
更恐虧挪庫款抑勒商民軍火固係要需捐辦究非長策值此帑
藏支絀亦未敢全數請銷惟有量爲變通請將同治十一年奉取
雙批責成各州縣循照舊章分別官民捐辦一批其餘一批卽於

司庫籌款發交保定府通判嚴實采辦一併解部所動之款作正開銷庶官民賠累稍輕要需不致貽誤嗣後卽按行取批數多寡隨時參酌辦理惟司庫歲入本不敷出近復蠲緩頻仍籌撥前項硝價已屬竭力所有順天每年辦解硝價應請免撥藩庫由部另行妥籌以免顧此失彼等情請

奏前來臣查直隸地方較他省瘠苦連年災歉官民益窮正在裁減攤捐釐剔出入爲州縣省一分用度爲百姓留一分資財若部硝層疊派捐萬難爲繼該司請將十一年分雙批硝斤以一批照舊歸捐一批作正開銷係屬權宜辦法其順天每年辦解硝價司庫不能再撥亦屬實情相應仰懇

天恩俯賜分別照准以示體恤理合恭摺具陳伏乞

皇上聖鑒訓示敕部查照謹

奏

挑潯中亭河摺

同治十二年五月二十八日

奏爲挑潯霸州文安等處中亭河以工代賑洩水勢而衛農田全工完竣恭摺仰祈

聖鑒事竊臣前因大清河限於地勢汎漲不能容納須開挖減水分流之河以紓其勢上年九月間曾於預撥庫款以工代賑摺內陳明在案查中亭河起自下黃亭以減潯州保定一帶大清河之水又上接盧僧河全派之水盧僧河者新城雄縣境內大清河上游之減河也其尾閘直達中亭相與合流經老隄龍門臺山等村至文安縣界穿王家泊荷花淀勝芳淀歸東大淀是中亭河實爲大清河分流下趨東淀要津關繫霸保安雄全局且北有牯牛河攔腰匯人附近窪水復相迸注必須寬深通暢方足以資容洩乃歷久廢弛河身節節淤塞其王家泊以下被永定河壅淤已成平

地大清河本極淺狹又失此一大分流是以盛漲一至四出旁溢爲害滋深近年滹沱北徙永定南決併入西淀大清河而東秋冬之際霸保之間往往浩瀚無涯民歎其魚鄰皆爲壑臣乘舟往來津保沿流溯源熟籌相機疏導之法因飭清河道葉伯英勘辦盧僧及西淀上下游隄河各工卽派營務處委員候選知府史克寬與霸州知州周乃大勘修中亭河以期水有去路並飭籌賑局司道於節存捐款及練餉錢生息項下陸續籌撥工費旋據史克寬勘議應挑丈尺辦法稟定章程於三月中旬開工積水漸漫施工不易該員等率同員紳築壩洩水分段堵疏並用分格遞挖法逐段挑濬上游之吳臺窪下游之淀泊積水相連隨厝隨挑泥淖太深之處撈挖尤費夫力計全河工長一萬二千八百九十七丈有奇面寬七丈至八丈四尺底寬三丈四尺至三丈六尺深八尺至

八尺四寸不等其河在村中有礙兩岸民房不能展寬者則從村旁添開引河其河在淀泊中不宜口寬而宜底深者則易寬爲深均相度地形爲之仍將各段所出之土考證舊址堆築隄埝以免漲溢分別工程難易酌給方價並於實係貧苦出力村莊量加犒賞遠近災民傭工趁食樂事赴功據報於五月十六日一律完竣河身通暢隄埝高厚委據候補知府徐本衡前往驗收工段丈尺相符現已開壩放水盧僧河下半工程即可接續挑挖從此大清河上下游盛漲得以分洩歸淀於農田水利實有裨益該員史克寬會督印委各官妥細經畫事事認真覈實速成要工尤爲勞勩卓著除動用捐款俟河隄各工報竣照案彙奏並飭該地方官籌議善後修守事宜稟辦外所有挑挖中亭河工竣緣由理合恭摺具

奏伏乞

皇上聖鑒謹

奏

李文忠公奏稿卷二十一